


شعر  
جابر ياقوت البنهاوي








10

11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100  
101  
102  
103  
104  
105  
106  
107  
108  
109  
110  
111  
112  
113  
114  
115  
116  
117  
118  
119  
120  
121  
122  
123  
124  
125  
126  
127  
128  
129  
130  
131  
132  
133  
134  
135  
136  
137  
138  
139  
140  
141  
142  
143  
144  
145  
146  
147  
148  
149  
150  
151  
152  
153  
154  
155  
156  
157  
158  
159  
160  
161  
162  
163  
164  
165  
166  
167  
168  
169  
170  
171  
172  
173  
174  
175  
176  
177  
178  
179  
180  
181  
182  
183  
184  
185  
186  
187  
188  
189  
190  
191  
192  
193  
194  
195  
196  
197  
198  
199  
200  
201  
202  
203  
204  
205  
206  
207  
208  
209  
210  
211  
212  
213  
214  
215  
216  
217  
218  
219  
220  
221  
222  
223  
224  
225  
226  
227  
228  
229  
230  
231  
232  
233  
234  
235  
236  
237  
238  
239  
240  
241  
242  
243  
244  
245  
246  
247  
248  
249  
250  
251  
252  
253  
254  
255  
256  
257  
258  
259  
260  
261  
262  
263  
264  
265  
266  
267  
268  
269  
270  
271  
272  
273  
274  
275  
276  
277  
278  
279  
280  
281  
282  
283  
284  
285  
286  
287  
288  
289  
290  
291  
292  
293  
294  
295  
296  
297  
298  
299  
300  
301  
302  
303  
304  
305  
306  
307  
308  
309  
310  
311  
312  
313  
314  
315  
316  
317  
318  
319  
320  
321  
322  
323  
324  
325  
326  
327  
328  
329  
330  
331  
332  
333  
334  
335  
336  
337  
338  
339  
340  
341  
342  
343  
344  
345  
346  
347  
348  
349  
350  
351  
352  
353  
354  
355  
356  
357  
358  
359  
360  
361  
362  
363  
364  
365  
366  
367  
368  
369  
370  
371  
372  
373  
374  
375  
376  
377  
378  
379  
380  
381  
382  
383  
384  
385  
386  
387  
388  
389  
390  
391  
392  
393  
394  
395  
396  
397  
398  
399  
400  
401  
402  
403  
404  
405  
406  
407  
408  
409  
410  
411  
412  
413  
414  
415  
416  
417  
418  
419  
420  
421  
422  
423  
424  
425  
426  
427  
428  
429  
430  
431  
432  
433  
434  
435  
436  
437  
438  
439  
440  
441  
442  
443  
444  
445  
446  
447  
448  
449  
450  
451  
452  
453  
454  
455  
456  
457  
458  
459  
460  
461  
462  
463  
464  
465  
466  
467  
468  
469  
470  
471  
472  
473  
474  
475  
476  
477  
478  
479  
480  
481  
482  
483  
484  
485  
486  
487  
488  
489  
490  
491  
492  
493  
494  
495  
496  
497  
498  
499  
500  
501  
502  
503  
504  
505  
506  
507  
508  
509  
510  
511  
512  
513  
514  
515  
516  
517  
518  
519  
520  
521  
522  
523  
524  
525  
526  
527  
528  
529  
530  
531  
532  
533  
534  
535  
536  
537  
538  
539  
540  
541  
542  
543  
544  
545  
546  
547  
548  
549  
550  
551  
552  
553  
554  
555  
556  
557  
558  
559  
560  
561  
562  
563  
564  
565  
566  
567  
568  
569  
570  
571  
572  
573  
574  
575  
576  
577  
578  
579  
580  
581  
582  
583  
584  
585  
586  
587  
588  
589  
590  
591  
592  
593  
594  
595  
596  
597  
598  
599  
600  
601  
602  
603  
604  
605  
606  
607  
608  
609  
610  
611  
612  
613  
614  
615  
616  
617  
618  
619  
620  
621  
622  
623  
624  
625  
626  
627  
628  
629  
630  
631  
632  
633  
634  
635  
636  
637  
638  
639  
640  
641  
642  
643  
644  
645  
646  
647  
648  
649  
650  
651  
652  
653  
654  
655  
656  
657  
658  
659  
660  
661  
662  
663  
664  
665  
666  
667  
668  
669  
670  
671  
672  
673  
674  
675  
676  
677  
678  
679  
680  
681  
682  
683  
684  
685  
686  
687  
688  
689  
690  
691  
692  
693  
694  
695  
696  
697  
698  
699  
700  
701  
702  
703  
704  
705  
706  
707  
708  
709  
710  
711  
712  
713  
714  
715  
716  
717  
718  
719  
720  
721  
722  
723  
724  
725  
726  
727  
728  
729  
730  
731  
732  
733  
734  
735  
736  
737  
738  
739  
740  
741  
742  
743  
744  
745  
746  
747  
748  
749  
750  
751  
752  
753  
754  
755  
756  
757  
758  
759  
760  
761  
762  
763  
764  
765  
766  
767  
768  
769  
770  
771  
772  
773  
774  
775  
776  
777  
778  
779  
780  
781  
782  
783  
784  
785  
786  
787  
788  
789  
790  
791  
792  
793  
794  
795  
796  
797  
798  
799  
800  
801  
802  
803  
804  
805  
806  
807  
808  
809  
810  
811  
812  
813  
814  
815  
816  
817  
818  
819  
820  
821  
822  
823  
824  
825  
826  
827  
828  
829  
830  
831  
832  
833  
834  
835  
836  
837  
838  
839  
840  
841  
842  
843  
844  
845  
846  
847  
848  
849  
850  
851  
852  
853  
854  
855  
856  
857  
858  
859  
860  
861  
862  
863  
864  
865  
866  
867  
868  
869  
870  
871  
872  
873  
874  
875  
876  
877  
878  
879  
880  
881  
882  
883  
884  
885  
886  
887  
888  
889  
890  
891  
892  
893  
894  
895  
896  
897  
898  
899  
900  
901  
902  
903  
904  
905  
906  
907  
908  
909  
910  
911  
912  
913  
914  
915  
916  
917  
918  
919  
920  
921  
922  
923  
924  
925  
926  
927  
928  
929  
930  
931  
932  
933  
934  
935  
936  
937  
938  
939  
940  
941  
942  
943  
944  
945  
946  
947  
948  
949  
950  
951  
952  
953  
954  
955  
956  
957  
958  
959  
960  
961  
962  
963  
964  
965  
966  
967  
968  
969  
970  
971  
972  
973  
974  
975  
976  
977  
978  
979  
980  
981  
982  
983  
984  
985  
986  
987  
988  
989  
990  
991  
992  
993  
994  
995  
996  
997  
998  
999  
1000







## الاهداء

الى زوجتى الحبيبة وشريكة عمرى ..

الى اولادى الاعزاء ...

مجدى - طارق - ابنتى نهاد ..

الى احفادى الاعزاء ...

هشام - ادهم - نورهان - مروان - آدم ..

مع التحية اهدى - ديوانى الثانى ...

المؤلف

جابر ياقوت البنهاوى



**المقدمة بقلم**  
**الشاعر الكبير / محمد مكيوى**  
**مشرف نادى الأدب**  
**بقصر ثقافة الحرية**

**على سبيل التقديم**

- \* الصديق العزيز الاستاذ جابر ياقوت  
البنهاوى شاعر من شعراء الاسكندرية  
المجتهدين الى جانب شخصيته المتزنة  
الجميلة متواضع ومحبوب بين اخوانه قدم  
لنا قبل ذلك ديوانه (نور الصباح) كانت  
بداية تشيد بصاحبها فى مجال الزجل .
- \* ومع ديوانه (حلاوة الحياة ) يقدم لنا  
توليفة من باقات الزهور فى ثوب جيد من

بـأزجال ورباعيات وأغانى ، والشعر لغة  
وصياغته مؤهبة وفكر ونرى البنهاوى  
يستعرض أفكاره من خلال ومضات ثقافية  
تدل على سعة إدراكه وحسن اختياره  
للموضوع أن كان فى النقد أو  
الوصف أو الغزل .

\* وعندما نتصفح ديوانه الجديد (حلاوة  
الحياة ) نرى كم من القصائد الزجلية  
والرباعيات المتقنة (والعجيب) يلتقط صورة  
من خلال منظور حديث لم يتطرق إليه احد  
من قبله ( التاكسى ، الألفية الثالثة ، الميزان  
، الاستتساخ ، أوراق ، فتلة وابرة خيط )  
عموما الأفكار فى هذا الديوان كثيرة وقنوعة

\* وأعود وأقول أن جابر البنهاوى  
ملتزم بالقوالب الزجلية الى جانب اعتماده  
على الموسيقى ذات الايضاح الهادئ التى  
تذكرنا بأمير الزجل أبو بئينة وابو عبده  
والسيد شطا ومع ديوانه (حلاوة الحياه)  
نتصفح الاوراق ويقول البنهاوى فى زجل  
بعنوان ( حياتى ) .

حياتى ماشية بمسطرة  
ولا عمري أحب المسخرة  
ولا حتى كلمة بفشخرة  
بالنور حياتى مصفرة  
دايما أساعد فى الهنا  
وأفضل أنا هو أنا

راجل تمام عالى همام  
ولا فى يوم أقدر أنام  
• القصيدة من بحر الزجل مقطعة  
حسب روى الحدث ورغم أنها من الشكل  
الحديث ولكنها تنتمى الى الزجل ومن  
قصيدة الى أخرى نلتقى مع هذا  
الزجل ( فلتة لسان ) .

قالوا اللسان ..

زى الحصان ...

أن صنته صان ..

وان هنته هان ...

يعنى المصير ..

مربوط على طرف اللسان ...

وربك المعبود ..



بـيه كرم الانسان ...  
أصل الكلام دا وسيله ..  
للاتصال بالناس ...  
وبكلمة حلوة قليلة ..  
يترجم الاحساسى ...

\* وفى هذه القصيدة الزجلية يتجسد  
الشاعر الى المورثات ويأخذ من الامثلة  
الشعبية ويقدم هذا النموذج (لسانك حصانك)  
فى يسر واقناع ومرة أخرى نعود الى  
قصائد الديوان ونسبح فى بحور الزجل  
ونقدم الاصدا ف يقول فى  
زجله ( أسلوب الحوار ) .

أنا أصلى كاتب انما ..

بأعمل حسابي .. عندما ...  
أكتب وأقول اذ ربما ..  
يحصل غلط وأكون أنا ...  
مستول عن الغلطة التي ..  
تطلع كبيرة وتقلتي ...  
مستول يحاسبني أنا ..  
واقفا من سنة ...  
قاعد أقول يا سوسنة ...  
قولي بقى وخطى الأنا ...  
الننى أنا ...  
خايف أقول ودى كلمتى ..  
طالعة شديدة ولهجتى ...


\* الى آخر هذه القصيدة الجميلة انتهى  
تعد من عيون الديوان تحمل مجموعة من

الفكار والرموز وتذكرنا بقصائد الشاعر  
الكبير (على المحمدى) وفى  
الديوان الكثير من الاعمال المتميزة  
والمتوقف أمام رباعيات جابر البنهاوى التى  
تذكرنا بصلاح جاهل يقول ..

الدنيا عاطية ظهرها والوش متخبي  
حتى الزمان من زمان تعبان معاد قلبى  
لو وشها يوم ضحك لى تانى يوم تلقاه  
مغلوب على وش تانى عدلها ياربى  
~~~~~

ابص الاقى الحياه فى الدنيا لها آخر  
ومهما طال الزمن شى نهايته له آخر والخط  
مره بيدى وساعات ما يدبش

والهم دايما يزورنى ياريتيه يتاخر




الأهل عزوه ووصل الرحم دا واجب

ايما يزورهم نمد الود دا واجب

وف ساعة الزنقة تلقاهم كثير حواليك

اصل اللى يعمل جميل يتردله واجب



\* وفى الديوان مجموعة كبيرة من

الرباعيات تستحق الاشادة ومع أغنية

(حلاوة الحياه) نقدم هذا

المقطع الجميل ..

الحياة فعلا قصيرة

ليه نضيعها فى عذاب

ليه على نعيش فى حيرة  
ليه يملانا الضباب  
ليه نخليها عداوة  
والصحاب دايما قليل  
ليه بتشغلنا بقساوة  
دى الحياة حلوة وجميلة

\* الى آخر هذه الأغنية التى نختتم بها  
هذه الكلمة والديوان يضم  
مجموعة من القصائد الجيدة التى  
تستحق الإشادة .

\* مع خالص التمنيات الطيبة لشاعر  
الاسكندرية المجيد / استاذ جابر البنهاوى

ومع لقاء آخر متجدد وإبداعات تثرى  
الحركة الأدبية في الثغر نلتقى .

والله ولي التوفيق

الشاعر الكبير

محمد مكيوى

عضو اتحاد الكتاب

الديوان القادم

أحلام وردية

كلمة الشاعر / محمود علي شحاته

بمناسبة اصدار كتاب ( حلاوة الحياة )

نور الصباح في البدايه لما جيت أقراه  
ضحك وقالى لى العميد جابر أنا باهواه  
وباحبه من قلبى وحياه ربى وياقول له  
الفن مين يعرفه الا اللى عاش فى حماه

.....

كلامه يجرح قلوب الناس ويبدوى  
أديب وزجال ويكذب شعر وغناوى  
متعدد الموهبة والموهبة من الله  
واسمه جابرو ستم الجندبنهاوى

.....

الكلمة يكتبها بحكمة وبذكاء وبعقل  
ويتوصل القلب والفكر السليم والعقل

صدق الكلام الذى قاله الحاج مكيوى  
الله عليه فى الزجل انت سيد عقل

.....

وبعد نور الصباح حاكبت واقول تانى  
عن جمال الذى قال ف ديوانه الثانى  
ان كلامك عسل وانت العسل نفسه  
وف كل شعرك يا جابر نظم وغانى

.....

وعن حلاوة الحياة انا شفت فى ديوانه  
كلام جميل والجمال باين فى عنوانه  
ولما بقراه بقول الله على المعنى  
نورد والفيل نور جوه بسنانه

.....

جابر اديب وحب الشعر جمعنا



وكلامه زى العسل فى الشعر والمعنى  
وعن حلاوة الحياة اكتب واقول تانى  
ياللا يا بلبل معاه غنى وسمعنا  
.....

## حلاوة الحياة

الحياة فعلا قصيرة  
ليه نبدها فى عذاب  
ليه بنبقى نعيش فى حيره  
لما يملها الضباب  
.....

ليه بنملاها عداوة  
والصحاب بتقل دايما

ليه بتشغلنا القساوة  
والهموم دى تبقى عايمة  
.....

والفرح بيعد تملى  
والنفوس بتشيل وتملى  
والغضب دايم يملى  
حقد اسود ببقى يغلى

.....  
لو تشوف الدنيا تلقى  
إنها زائلة وفانية  
واللى يفضل فيها يبقى  
الوداد والحب ثانية

.....

لما تحسبها تلاقىها  
كلها ما تساوى زعطة  
والفرح لو كان مالىها  
تبقى هائلة تروق وتحلى  
.....

أصل كان فكرى يحاورنى  
يجى ويقول من زمان  
كانت الناس قلب صافى  
والحياة كانت أمان  
.....

والولاد عمالة تضحك  
والاهالى فرحانين  
والوداد بينهم يخلى  
الوصال دايم احنين  
..... ٢٣ .....

تصبح الدنيا جميلة  
والوفا يرفرف عليها  
تفضل الاحزان قليلة  
والفرح غالب عليها

.....

والقلوب رايقة وصافية  
مخالصة فيها الوفاء  
تنسى احقادها تملئ  
تتملى حب وهناء

.....

## نهار جديد

الشمس طلعت وابتدا ضوء النهار ..

والصبح طالع يوم سعيد ...

جايب جديد ..

ادى الامل قدام عينيك ...

بص تلاقيه قرب عليك ..

ياالله اخطفه ...

حقق بيه اللي ترغبه ..

من حب كان واللازمان ...

نال بالقليل كل الرضا ..

وبالقناعة يرتضى ...

حامدين بقى لرب العباد ..

ولا فيه سهاد ...

كل الهنا كده عندنا ..

قاعدا وساكن جنبنا ...  
والرزق متقسم تمام ..  
من رب عادل لا ينام ...  
والسعي دا يلزم لنا  
من عندنا ..  
لا ننام ونتكل عليه ...  
ونقول يجينا لحدنا ..  
طعم العرق اما يسيل ...  
بعد العمل على الجبين ..  
والنقطة منه تبقى خير ...  
ودليل على الجهد الكبير ..  
والرب بيبارك لنا ...  
في الرزق احنا واهلنا ..  
لا بناذى غير ...

وعلنا خير ..  
و بندعى رب اسمه الكريم ...  
واللى فى رحابه لم يضيم ..

.....

## الألفية الثالثة

داخلين على الف ثالثة ..  
طب ح نعمل ايه ...  
يا هلترى احنا جهزنا ..  
والعمل دا ايه ...  
دا العصر والكمبيوتر ..  
وفاكس والكترونات ...  
وحاجات جديدة ما تعرف ..  
دا غير بقى اللى فات ...

عازرين نحضر حاجاتنا ..

ونحصل اللي فانتنا

نعمل حسابنا اللي جاى ...

ونجهز أولادنا ..

مصانعنا تبقى حديثة ...

وكمان بقى بيوتنا ..

نزرع نكفى حاجاتنا ...

ونصدر اللي يفيض ..

والميه نعمل حسابها ...

لازم نرشدھا ..

نرجع ونستخدمھا ثانی ...

ونروى بيهأ أراضى ..

ولا تضیع فی بحور ...

وابات انا مقهور ..



ولكل حنفية جلده ...  
ويكون سيفون مضبوط ..  
ولا نقطة تنزل خسارة ...  
والزرع عندي يموت ..  
دا قرن صعب تمام ...  
مش عايز اللي ينام ..  
لا زم نفتح عينينا ...  
ونخلى بالننا علينا ..  
لا العزح يروح علينا ...  
والهم يكثر علينا ..  
.....

## حسبة الأيام

كل صباح يوم جديد ...

احسب الايام واعد ...

مر يوم من عمرى فات ..

واللى جاى نقصوا يوم ...

والاجل محسوب تمام ..

هوه ساعة محدده ...

عمر ما يزيدھا الكلام ..

او دقيقة مجددة ...

قصدى راح اسيب العدد ..

والتفت على اللى راح ...

واحسب اللى عملته ايه ..

خير بقى ...

أو حنى شر ..

واللا عيال ...  
بس راح ناخذ عملنا ..  
واللى كان واللى فعلنا ...  
خير نكون سبناه ..  
ابن صالح ربناه ...  
ذكرى حلوة معطرة ..  
حتى حسنه مظهره ...  
فرض واجب ادبناه ..  
او يتيم جنباله له حقه ...  
او ربتنا يوم عليه ..  
او زكاه وادبناها ...  
صدقة واجبة جربناها ..  
حسنة عطناها لفقير ...  
او اجرنا مستجير ..  
او نصرنا مظلومين ...

كل يوم عدي ومر ...  
هوه دا يبقى الحساب ..  
حد عارف فاضل ايه ...  
واللى بكره حيجري ايه ..  
كل دا هوه فى علمه ...  
واحنا محتاجين لحلمه ..  
رحمته هيه الامل ...  
لما حيحين الاجل ..  
نرجع الأخرة قوام ...  
لو غفلنا راح ننام ...  
كل شى يبقى ورائنا ...  
مش حتاخدا اى جاه ...  
او حتى مال ...

او اعنا محتاجين ..

او دللنا تائهيـن ...

او بقينا منصفين ..

دا يقربنا الى الله العظيم ...

ويساعدنا فى الحساب ..

لما نلعن يوم فى شيطاننا الرجيم ...

عمر ما نشوف العذاب ..

رحمته الواسعة تجينا ...

وتلاقينا ..

اننا عشنا عملنا اللـى علينا ...

من - صيام من صلاة ..

من زكاه - من شهادة ...

زرنا بيت الله وطفنا فى الحرم ..

واحنا نطلب رحمته ...

والامل فى محبته ..

..... ٣٣ ..

## الاستنساخ

قرئت خبر فى الجرائد قالوا فيه استنساخ  
اخذوا خلية من نعجة وقالوا ان كله مباح  
حنعملوا نعجة جديدة فيها كل صفات  
من أمها وحتى مش ضرورى لقاح

.....

جابو الخلية وخصبوها لزقت فمجدد ملام  
وبعد ما حصل حصلت ولادة للام  
ونعجة طلعت شبيهها الخالق الناطق  
وقالو دا العينة واهو دا اللى بهم

.....

وقالوا ممكن نخلق من كده الوفات  
ونملى دنيتنا نعاج وكمسان بقى حوانات  
الفكره هيه بسيطة يلزم لها ترتيب

ممکن نحضر وفي المعمل نجيب نعجات

.....  
وسکتوا برضه شویه وقالوا کل شیء ممکن  
وفکروا فی الانسان وقالوا ان دا ممکن  
یکتروا فی البشر من غیر زواج ولا مهر  
ونرحموا الشباب من السکن والقهر  
.....

بس اللى فاهمة انا ان ربك خلقنا مختلفين  
لو حتى كنا شقایق برضيه احنا مختلفين  
لا بصمة زى اختها ده مهما یکتروا الناس  
ولكل واحد طباع اشكالنا مختلفين  
.....

ازای بقى تنسخوا من واحد نقول الفین  
یبقى الشبه والطباع والكل متحدين

ازای بقى يعرفوا بعض أو احنا نعرفهم  
وازاى تصير الشرائع واحنا مش عارفين

.....

ربك دا له حكمة كبيره فى اللى كان ويصير  
لو كان مراده كده كان خلق الصنف كله كتير  
وكان وضع فى الكون كل البذور واحدة  
وكانت الناس نسخة واحده والشئ ده يبقى خطير

.....



## حياتى

فى حياتى ماشية بمسطره ..  
ولا عمرى أحب المسخرة ...  
ولا حتى قلت بفشخره ..  
ان حياتى منوره ومصنفرة ...  
دايما اساعد فى الهنا ..  
وافضل انا هو انا ...  
راجل تمام عالى وهمام ..  
ولا فى يوم اقدر انام ...  
لو كان فى شر فى سكتى ..  
اصلى كده راجل قوى ...  
فى معامله عمرى ما اتلوى ...  
واكون صريح ولسان مريح ..  
ومش قبيح ...

حافظ لناسی ودهم ..

وف قلبهم ...

دایما بیحبونی قوی ..

واقول وعود ...

وعمری ما ف مرة اعود ..

فی یوم فی کلمه قلتها ...

او عشتها ..

لان اقف کده عندها والمها ...

واضمها ..

ویکون شعوری نحوها ...

زى اللى قطعة منى کات ..

ومن سکات ...

افضل اردد ان انا ..

لازم اخطی دی القنا ...



واعبر جدار الخوف ..  
لو حتى اعمى مش باشوف ...  
ولا ابقى يوم زى الخروف ..  
اللى خدوله نعجته ...  
وبهمته ..  
سكت وماما مرتين ...  
وقال يا مين -..  
ينصفنى من جزار زعيم ..  
قاسى ولنيم ..  
اخذ حياتى ومهجتى ...  
يا دهوتى ..  
دا حتى عيب دالك قرون ...  
وعليك تهون ..  
طب حتى ناطح لجلها ...  
لو صخرة اكسر منها ..

حتى حجر وبالارادة تلين صخر  
ودا كله يرجع للصمود ..  
ولا حتى اعود ...  
للسيره اللي قلتها وسمعتها ..  
اهو كان الكلام ...  
ويروح قوام ..  
يتلاشى في الكون الفسيح ...  
اصلى فصيح ..  
وشغلتي هيه الكلام ...  
وباقول سلام ..

.....

.....

.....

.....

.....

## اعظم حب

سكن الهوى فى قلبى باعظم حب ..  
كان حب نابع من حشاش القلب ...  
حب الجمال ..  
حب الامل ...  
صوره حياه ..  
فى جوه قلبى بتترسم ...  
ومتسيبوش ..  
وبختم قلبى بيتختم  
ولا يطلعوش ..  
أصل الحياه لما بدت ...  
واتكونت ..  
كانت علاقة حبهم ...  
هيه الاساس ..

من قبل حتى ما يعرفوا ...

ان القلوب تخفق قوام ..

لما يكون جنس اختلف ...

يعنى رجال ويا نساء ..

الاثنين بسرعة بيعرفوا ...

والحب يجمع شملهم ..

مع بعضهم ...

يبقوا روحين جوه جسد ..

واحد وعمره ما يفترق ...

الفكر واحد ..

انما شئ مختلف ...

رعشة قلوب ..

وحنان يدوب ...

وامل جميل ..

وقلوب تميل ...  
ويقول يا مين ..  
يدلني ايه العمل ...  
وحبيبي فين ..  
والحب عندي اكتمل ...

.....

.....

## عيد ميلاد الرئيس

النهار ده يوم ميلادك يوم مجيد وفيه نشارك  
بالوداد والحب كله للرئيس حسنى مبارك  
دى القلوب دايم بتدعى بالنجاح والخب إليه  
ربنا يرفع فى شأنك يا رئيسنا يا مبارك

.....

إحنا ميت مليون مواطن كلنا بنأيدك  
مشروعاتك تخطيطاتك كلها منك وبك  
مترو أنفاق او فى توشكا مشروعات بتفيد تمام  
أهل بلدك دول معاك والدعاء دا كله لك

.....

ربنا يطول فى عمرك للبلد تقدر تزيد  
الكرامة والفتوة و الرخا فى عهدك أكيد  
ربنا يسهل طريقك ويبقى مفروش بالورود  
أصل انت ابن مصر القوى عهدك سعيد

.....

فى السياسة الخارجية مرفوعين الراس تمام  
والدول دى بتحترمنا أصلها نحب السلام  
مدخلة فى كل المعارك بالهداوة والاتفاق  
أصل كل الناس تحبه قد ما يحب السلام

..... ٤٤ .....



أما سينا دى حبيبته عشقها يجرى فى دمه  
عمر الصحراء اللى فيها بالمداين كل همه  
يكتروا السياح ويملوا مصر خير دخل السياحة  
والرخاء يعم علينا والديون تتلم لـمه  
.....

هوه ده المصرى الصميم اللى يحتاجه الوطن  
ربنا بعته الينا دره غاليه ما الزمـن  
يرفع المصرى وكرامته تبقى فوق كل البلاد  
وف بلدنا الناس سعيدة بانتمائها للوطن  
.....

## حرب الاستنزاف

أنا كنت جندي على شط القناة في الاستنزاف  
وكنت أشوف العدو قدامى عمرى ما أخاف  
وكل يوم نسمع شتيمة تنقال فى ميكرفونات  
وبنات على الشط لابسه يا دوب مايو هات

.....

وكن بنشوفهم قبل ما يعلو بسد تراب  
كانوا يغيظونا وطول اليوم بيرموا سباب  
ويقولوا يا مصرى احنا هنا نحكم ونتحكم  
وانتوا وجيوشكم ولا تسوو حتى زلطو تراب

.....

كان كل يوم يضربوا قواعدنا بالطيران  
وكننا يومها ندافع بمدفع بس مش ببيان

مداه قصير وكانوا هما يطيروا فى العالى  
ولا كنا نقدر نصيهم كان العذاب ألوان

.....  
من غلبنا كنا يستعمل سلاح القـر  
اول ما تظهر طيارة تكون بتتوى شر  
نقول عليها جميلة تلمع برضه بنحسدها  
يمكن تقع من قرنا أو نتوه فى الجو

.....  
وكل دا واحنا بنبنى دى قواعد الصواريخ  
نتقدموا خطوه بخطوه عالشط بالصواريخ  
وكل يوم يضربونا ويدمروا قاعده ورا قاعده  
ونبنى غيرها قرام ونركبوا الصواريخ

.....  
ولما كملت صواريخنا تمام بطلوا يغيروا

وخافوا منها قوى وبطلوا يطيروا  
جهزنا للحرب لما بنينا عالشط خط دفاع  
ودا قبل ما نعبّر لسينا ولعمقها نسيروا  
.....

كنا نعدى بمراكبنا فيها فدانيين  
بيبنوا ارض سيناء ولازم يعملوا عمالين  
دمل يصنور ويصحح ضرب مدافعنا  
نرجع فى نص الليل والناس كده نايمين  
.....

كان كل دا تجهيز قبل العبور برمان  
عشان يكون العدو معروف لنا وأمان  
كانت الخطط تترسم تعرف بأوضاعه  
اعرف عدوك قبل ما تحارب تعيش منصان  
..... ٤٨ .....

وسدوا مواسير النابالم قبل الجيش ما ينزل  
ويعدى جوه القناة وتحرقوه لو ينزل  
وهندوا سائر ترابى بالمياه نسفوه  
والنصر بيهيم تحقق على قد ما يبذل

.....

وبعدها حصل العبور واتقدموا جيوشنا  
من بعد ما مهدوا كل الخطط شوفنا  
وعرفنا كل معلومة عنهم وخططنا  
وكسبنا يومها حربنا بعد ما زال خوفنا

.....

فى الحرب دى اتقدموا القادة صفوف جيشهم  
ودا اللى شجع على التضحية الناس وبنفوسهم  
فادوا الحروب فى الميدان مش من مكاتبهم  
ونصر اكتوبر كان لمصر ولجيوشهم

..... ٤٩ .....

ودى حكاية ناس جهزوا للحرب قبليها  
بذلوا نفوسهم للاستعداد وراحوا فيها  
دخلوا صفوف العدو واستطلعوا اثرهم  
وعرفوا كل حاجة عن العدو ووصفهم

.....

ربنى كريم ورزقنى باعز احفادى  
مثنوان وادهم هما اعز اولادى  
يشهد ظهري بهم دول عزوتى وناسى  
يارب خليفهم افرح بهم اغلى احفادى

.....

الموت دا سيف ومتسلط على رقاب العباد  
لكن بقى الموت عمره ما يفنى والحياء تنعباد  
تتجى المواليد وتملى الدنيا تانى حياه  
تبقي الحياه مستمره والبركة فى الاولاد

..... ٥١ .....

ليه انتى فاهمة ان ما فيش فالجمال زيك  
ولا حتى وش القمر ضيه مثيل ضيك  
وان رمش عينك ضرب لازم يصيب الوفيات  
والنظرة منك بتأس القريب منك  
.....

الدولة تاخذ ضرايب من الناس وتصرفها  
على الشوارع والمجاري وادي احنا بنشوقها  
مستشفيات ومدارس والفائدة لكل الناس  
واجب علينا تساعد الدولة في مصارفها  
.....

.....  
.....  
.....  
.....

## ملحمة العبور

يوم السادس من اكتوبر ..

ليس كيوم عادى ...

مر ولكن بعد صراع ..

يوم كرامة ردت قسرا ...

وغرور ضاع مع التيار ..

تيار عارم ...

صيحات هزت كل الكون ..

لجلال الله - وهو الاكبر ...

يوم سالت فيه دماء ..

لعدو غادر ...

ايضا سالت فيه دماء ..

لشهيد طاهر ...

يدفع ضرا عن ارضه ..



ويحررها ...

من مغتصب نسي الدنيا ..

بغرور قاتل ...

تأييد من دول كبرى ..

للعديوان بدون حياء ...

عبر الجيش الشط الآخر ..

كان عبوراً مشهوداً ...

كان عبور فوق مياه ..

فيها العائق تلو العائق ...

سطح مياه منبسط واسع ..

سد تراب يعلو بالامطار ...

وحصون وقلاع شتى ..

تجهيزات للألغام ...

ومرايض للدبابات ..

وغير ذلك ...

وجنود تحرس عبر التحصينات ...  
واصابع فوق زنار ..  
تطلق طلقات عفوية ...  
عند الشبهات ..  
وجنود بالشط الغربي ...  
صبروا ست سنين قهرا ..  
بدماء فى عروق تغلى ...  
يملؤهم شوق وحنين ..  
ينتظروا اليوم المشهود ...  
يوم النار ويوم القهر ..  
يوم يرفع عار هزيمة ...  
عبئ حروب الغدر الظالم ..  
لم يختبر الجندى المصرى ...  
كيف يحارب دون غطاء ..  
لكن عبورا قد خطط ...

ضربات بالجو تمهد...  
ومدافع تزار بالنيران...  
وقوارب مطاط فوق الماء...  
وصواريخ تصنع حائط...  
تسقط كل عدو يظهر...  
او طائرة تدخل عنده...  
كان الرعب يغطي الساحة...  
يسقط طائرة - تهرب أخرى...  
والجيش بثقة يتقدم...  
وجنود تصعد سائر رمل...  
تصعد تصعد تتقدم...  
غطوا السائر لم يظهر...  
صیحات هجوم تكبيرات...  
نزلوا حول التحصينات...  
٥٥

هجموا بقوة كروا عليها ..  
اخذوا اسرى قتلوا الطغيان ...  
خصبوا الأرض دماء ..  
بدلوا جهد وعناء ...  
كانو صياما فى رمضان ..  
والنصر هو الافطار ...  
رفعوا العلم المصرى عليها ..  
كتبوا بدماء الشهداء ...  
اعظم ملحمة كبرى ..  
كان النصر فى رمضان ...  
كان السد ترابا غالى ...  
يبلغ عشرات الامتار ...  
لم يحتار العقل المصرى ..  
فكر كيف يزال تراب ...  
بطلمبات مياه تضغط ..

أنهار السد في ساعات ...

تشهد ان العقل المصرى ..

جاهز في كل الاوقات ...

وفتحنا ثغرات عده ..

نفدت منها الدبابات ...

بعد اقامة كل كبرى ..

اسكتنا كل مقاومات ...

خاض الجندى كل معارك ..

كمشاه أو دبابات ...

ينخل عارى الصدر عليها ..

ليس يبالي بالطلقات ...

يقذفها بمقنوف نارى ..

ويفجر الدبابات ...

منحمة حدثت في سينا ..

معركة الجيش الحقيقية ...

اداما بروح فدائية ..

كانت معركة الحرية ...

يوم السبت باكتوبر ..

.....

## الميزان

الميزان دا أهم حاجة تبقى موجوده فى حياتنا

الميزان دايمًا بيضبط كل حاجة فى حياتنا

لحمة توزن خضرة توزن جبنة برضه بالميزان

يعنى كله بالميزان هو بيسير حياتنا

.....

لما نسخن برضه حبه بالميزان بنقيس نشوف

شرطه زايده تبقى خطره لازم الدكتور يشوف

كمدات نعمله راسه تبقى تبرد حبه حبه  
لما تنقل الحرارة تبقى حمى تموت ألوف

.....

بالميزان نوزن بلاطه جوه أرضيه فى بيتى  
بالميزان نوزن جدار هوه واقف جوه بيتى  
يعدلوا بيه المباني تبقى برضه مستقيمة  
فيه قزاة فيها ميه بالهوا يضبط لى بيتى

.....

وبميزان العدل جوه فى محكمة يحكمنا قاضى  
وفى جرايم يدى حكمه بالقانون وتبقى راضى  
هوه ميزان يبقى عادل واللى ماسكاه تبقى عاميه  
لجل حكمها يبقى عادل واللى يحكم هوه قاضى

.....

برضه فيه ميزان لشعري لضبط الابيات عليه

والميزان يبقى دقيق والودان تتشد إليه  
تطلع النعمة لذيدة شعري يبقى فيه موسيقى  
لو ما فيش ميزان في شعري ربنا يعوض عليه

.....

فيه ميزان جوانا برضه يبقى اسمه الضمير  
دا ميزان حاكم علينا بس حكمه شديد خطير  
لو بنغلط أو بناذى يذهب النوم من عنينا  
هو يضبط يوم فعالنا زي ما يكون الخفير

.....

في المراكب في ميزان يوزن الميل في البحار  
كل مركب تبقى مايله في الحدود جوه البحار  
كل موجه تميل معاها برضه لازم تتعدل  
والميزان هو المؤشر تمشي عدله في البحار

..... ٦ .....  
.....



وميزان أوزن فيه جسمى لو تخنت يوم زيادة  
يوم ما أكل أكله حلوه فيها دهن يكون زياده  
والزيادة فى جسمى تمرض برضه بضيق هدمى  
برضه ضغطى يبقى على برضه سكر فيه زيادة

.....

وبميزان العقل نوزن دايما الكلمة الجميلة  
فى المعاملة برضه لفظك كل كلماتك أصيله  
تبقى كل الناس صحابك قلبهم يبقى عليك  
أصل من طرف اللسان كلمة تطلع كل ليله

.....

فى ميزان فى الاخرة برضه يبقى اسمه الصراط  
قد شعره تفوت عليها تتعدل وتقول أهات  
واللى عمله كان دا خير يروح لجنات النعيم  
واللى كان فى الشر ماشى يبقى يضرب بالسياط

..... ٦١ .....

.....

.....

## بنت حلوة

أنا بنت حلوة صغيرة ..  
متغندره ...  
شعري صغيره قصيره ..  
متحيره ...  
سنى يا دوب لسه بدا ..  
سن الشباب ..  
وانا اصى تفكيرى ابتدا ..  
بسنين عذاب ...  
تفكيرى فى فارس همام ..  
راكب حصان ...  
يخطفنى على ظهره قوام ..  
بس الحصان ...  
لازم يكون ابيض ..

ما يکونش یوم بنی ...

حلمی بقی یکمل ..

وتقول کده عنی ...

انی انا لیلی ..

وهو اصله قیس ...

او هوه کان رومیو ..

ابقی انا جولیت ..

والحلم یبقی کبیر ..

ویساع خیالاتی ...

وافرح انا واطیر ..

لکن بقی الواقع ...

بیشد آیامی ..

والنور بقی ساطع ...

وانسی احلامی ..

واعیش بقی ف أمان ...

واستتى يوم الحصان ..  
والفارس الابيض ...

.....

## رباعيات

أحلى علاقة فى الزمن هية أرتباطك بالصدى  
ده ببقى سندك فى الحياة وبينجداك لو كان فيه ضيق  
سرك معاه محفوظ تمام وف شدتك تلقاه معاك  
أحسن قوى من أخ صادق هو دا بحق وحقيق

.....

الضلمة بتسبب قلق وبعضهم يحصل له خوف  
لكن ستاير الخجل بتترفع و لا فيه كسوف

والناس تواجه بعضها من غير حاجة تهمها  
لكن في ناس بتخاف تمام تلقى الأسد يصبح خروف

.....

قالوا الحرام ما يدومش لكن عنده بقى دايم  
حاجات سرقها زمان ولا لقاش لايم  
أمين مخازن كبيرة لكن ما صانهاشى  
هلب له منها كتير ولأمن كان نايم

.....

البحر زاخر وجواه الحياة ألوان  
فيه السمك من كل نوع وفيه كمان سرطان  
ودنيا تانية جميلة فيها شعب مرجان  
وزهور نبات جنبها ودا تحت مش حيان

.....

الناس قلوبها حجر منحوتة من صوان

لما يشفوا ولد من غير هدم بردان  
لاحد يتحرك وياخذه فى الدفا عنده  
ولا حتى حن عليه وكأنه مش انسان

.....  
**رباعيات**

راكب ترامى وقاعد فى كرسى كبار السن  
من قبلها كنت واقف امامه ما فى حد يحن  
ستات وقاعدين فى مطرحنا ولا يباليو  
ومهما تحكى تقول لا تلاقى حد يحن

.....  
والدين دا لما تتبع تعاليمه تعيش مرتاح  
وجوه فى كتاب ربنا فيه الهدى واصلاح  
ولا فانش حاجة فى كل حياتنا موجودة  
وفيه كمان احكام تقيدنا ونكمل الاصلاح

..... ٦٧ .....

لكن فيه ناس بيتبعوا الآيات فى أولها  
ويسيبوا باقى الآيات ما يكملوا آخرها  
زى الصلاة والخمرة لما الناس بقوا يقولوا  
لا تقربوا الصلاة وينسوا السكر آخرها  
.....

والناس تقول دا زمان كان الوداد موجود  
والحب كان ساير فى وسطهم وكان موجود  
تلقى التعاون تملى موجود فى الازمات  
دلوقت بندور عليه واظن مش موجود

.....  
وفنوس قليلة زمان بتكفى العيلة وتريدها  
فى النبس والاكل وكان الرضا يزيدها  
والدنيا سهلة يسيرة ولا حتى فيه صعوبات  
واللى يزيد عنه يدى الفقرا منه ويريدها  
..... ٦٨ .....



المسئولية دى خمرة بتسكر كل اللي يحملها  
ويبقى مسكين وتايه ولا عارف حاجة يعملها  
دى الزوجة والبيت وانعيال مصاريف كتير خالص  
لازم تكون هرقل عشان تقدر حتى تحملها

.....

## رباعيات

راقد على سريرى وعينى لم يجيها نوم  
اصل المرض لما يجيى تحسبه باليوم  
ولما يبدأ خفيف لازم يـأخذ وقته  
له مدة محدودة ولازم بعدها بيقوم

.....

وانا هنا فى وحدتى راقد على جنبى  
مش قادر اقعد عدل وانا بس ايه ذنبى  
هوه المرض دى او امره وهو دا طبعه

ربى بايده الشفا وانا طائب حما ربي

.....

مراتى سافرت بعيد ما قدرت اوصلها  
كبرت قوى المسافات لما الفراق طالها  
بينى وبينها الالف والالف والعد بالكيلو  
من بعد عشرة طويلة ربي يعدلها

.....

الدنيا من غيرها مش عارف اعيش فيها  
هيه حياتى ونور عينى ودا كله كان ليها  
اتاريها نعمة كبيرة بس انا ما اعرف  
يارب ترجع من سفرها والرب يحميها

.....

اليوم يعدى طويل وانا جوه مستشفى  
بعد الزيارة ما تمشى وانا قاعد فى مستشفى

قاعداً افكر فى ايامى اللى فاتت ولا بترجع  
ودا حساب احسبه ولا برضه مايكفى

.....  
قاعداً فى بيتى وبشاهد فى تلفزيون  
مستنى يجيى المسلسل فى اى وقت يكون  
بيجى الميعاد وابص الاقى ساعة اعلانات  
وبعد ما ازهق اروح قافل دا تلفزيون  
.....

### رباعيات

ايه فايده المال لما الصحة تكون راحت  
ايه فايده الحب لو ريحته تكون فاحه  
ايه فايده السلطة دى اصلها رايحة  
ايه فايده الدنيا لما فى ثانية دى راحت

..... ٧١ .....

اقعد لوحدى واستعرض كده اللي فات  
واللى مضى من عمرى واحسبه فى ساعات  
وابص ايه اللي عملته واللى صدر منى  
واقضل احاسب فى نفسى خوف يصيبنى ممات  
.....

فارد قلوعى وماشى فى بحرى ولا سائل  
والموج مساعدنى ودافعنى ولا حائل  
طب ليه بقى الحظ مش عندى ولا مواتى  
يا هلترى الريح بقى ساعدتنى بدون طائل  
.....

الحب لو تعرفه كويس وتشوف حقيقته ايه  
ونفصله كده نحسبه ونشوف نتيجته ايه  
والعن يكون مناسب بين اللي بيجبوا  
واهو بيقى مضبوط ولا بيقى فى حاجة عليه  
..... ٧٢ .....

اقعد على شط بحرى وحدى وانا سارح  
ضارب بنظرى لحد الشوف كده امبارح  
والدنيا فى نظرى ما تسوى جمال المنظر  
واتأمل البحر وانا صدري كده شارح

.....

انام واحلم واحلامى كبيرة تمام  
بحلم بدنيا جديدة فيها خير وسلام  
وناس جد ومش زى اللى احنا معاشرناهم  
اخلاق عظيمة وحب كبير وكل وئام

.....

## فلتة لسان

قالوا اللسان ...

زى الحصان ..

ان صنته صان ...

وان هنته هان ..

يعنى المصير مربوط ...

على طرف اللسان ..

وزبك المعبود ...

بيه كرم الانسان ..

اصل الكلام دا وسيلة ...

للاتصال بالناس ..

وبكلمه حلوة قليلة ...

بتترجم الاحساس ..

الحب يبدأ كلام ...

وبعده يجى الغرام ..  
والكره غلطة لسان ...  
وبعده يبقى الصدام ..  
والكذب برضه لسان ...  
والصدق برضه لسان ...  
والكلمة حدوته- وتبقى ملتوتة ...  
لما المعانى تروح ..  
والريحة منها تفوح ...  
وبداية فى معارك - والكل بيشارك ..  
وكلام بيحصل كثير ...  
ويتنقل ويزيد ..  
تلقى الحقيقة تروح ...  
بين الخناق والنوح ..  
وتبقى فلتة لسان ...

والاصل فى الانسان ..  
الخير ومش الشر ...  
لو يوم يبطل قر ..  
هو السبب اللسان ...  
وبيه ضياع انسان ..  
.....

## العمر ضاع

الوقت فات ...  
وبقى الكلام زى السكات ..  
وانا اعمل ايه ...  
وف ايدى ايه ..  
كل الخيوط اتربطت ...



وانلخبطت ..  
ما فضلش ليه غير الأسية ...  
والانتظار - والشاى فار ..  
والميه نزلت عالجناب ...  
ضاع الشباب ..  
من غير حساب ...  
والقطر فات ..  
وأنا لسه مستنى ...  
ولنفسى بأمنى ..  
بشريكة تصاحبنى بقية العمر ...  
لكن فرغ الصبر ..  
خدنى الشيطان ...  
سرح بيه ونسانى ..  
إن الاوان ...

دا فات وأه يانى ..  
لا ليه ابن حبيب ...  
ولا بنت ليه تجيب ..  
حفيد يقول يا جدو ...  
وفروعى يتمدو ..  
بيقالى فى الدنيا ذكرى ...  
والوحدة صابتنى - والاهل فانتتنى ..  
والكل مشغول فى بيته ...  
ولاحد فاضى لقيته ..  
وح موت أنا لوحدى ...  
وعينيه مفتوحة ..  
ولاحد يقفلها - وضاع كده عمرى ...

.....

## أوراق

أبصر الأقبى الورق ذا مهم فى حياتنا  
وحياتنا من غير ورق تشبه تمام موتنا  
وف البداية ورق برضه نهايتها ورق ثانى  
حتى فى نص الحياة ملىان ورق بيتنا

.....

يوم الميلاد تتكتب ورقه فيها اسمى  
وتاريخ ميلادى مسطر يوم ما تولد جسمى  
أثناء طفولتى بأخذ أختام من الصحة  
أمصال طفولة وقاياه من الأمراض تيجى لجسمى

.....

وفى الحضانه تتقدم الاوراق لمكتب التنسيق  
لازم يكون مجموع سنة يكفى بقى ويليق

ودوسيه بنملاه ورق مختوم على آخره  
ودى بداية الانسان أول ما بيدى طريق  
.....

وفى المدارس بيتعلم على ورق كراريس  
وفى ورق الكتب يقرأ ويحفص التضاريس  
والأمتحان يمتحن على ورقة بيضه ويجاوب  
وأخره يأخذ شهادة تبقى ورق ويهيص  
.....

وبعدها يخش فى الجامعة سنين وسنين  
يدرس ويتعلم ويقرأ من الكتب الفين  
يكتب محاضرات على ورق يحفض كثير منها  
وبعدها يبقى يتخرج بعد كده بسنين  
.....

ياخذ شهادة على ورقة وفيها صوره  
٨٠

تثبت بأنه درس فى الجامعة والدوره  
لو حب يدرس بعدها فى دراسة علىوى  
أخرتها برضه ورق واهى تبقى مستوره

.....

يجى الجواز لو خطب حب يجيب شبعه  
ياخد من الصايغ فاتوره وتكون ورقة  
يثبت لأهل العروسه أن دى غاليه  
ويتم الخطبة وخطيبته تكون واقفة

.....

يوم الفرح يحضر المآذون لكتب كتاب  
ويكتبه على ورقه بتجمع الأحباب  
والناس تشوفها تظمن على بناتها  
دا عقد لازم ضرورى بيصحح الأنساب

..... ٨١ .....

بعد الجواز لما يقدم لو حصل فيه خناق  
ببرحو تانى على المأذون ويمضوا طلاق  
برضه على ورقة لكن يبقى يومها حزين  
دى ورقه تخرب بيوت كان فيها برضه وفاق

.....

وبعدها فى المحاكم الزوجه تتقدم بأوراقها  
دى أصلها عايزه مؤخر ونفقة لولادها  
ييقوا المحامين يقدموا أوراق ورا أوراق  
لحد ما يحكم على ورقه تنضم لأوراقها

.....

وفى النهاية يكون الموت مصير إنسان  
ودا لازمه ورقة بشهادة انه كان عيان  
وبعدها تطلع شهادة وفاه انه فطس خالص  
ودى ضرورى كده تنهى حياة إنسان

..... ٨٢ .....

ولما يدخل المدفن عشان يرتاح لازم تصريح  
عشان بقى يندفن ويشوف له قبر مريح  
والورثة من بعد موته على المحكمة دغري  
يجيبوا شباك ورائة واهى ورقة مش تصريح

.....

.....

## اسلوب حوار

انا اصلى كاتب انما ...  
باعمل حسابى عندما ..  
اكتب وأقول اذ ربما ...  
يحصل غلط واكون أنا ..  
مستول عن الغلطة التى ...  
تطلع كبيرة وثقلنى ..

..... ٨٢

مسنول يحاسبنى أنا... ..

وانا من سنة .. ..

قاعد أقول يا سوسنة ... ..

قولى بقى وخطى الانا .. ..

اللى أنا ...

خايف أقول ودى كلمتى ..

طالعة شديدة ولهجتى ...

يمكن تكون مش مستوى ..

وان قلتها رح تتلوى ...

وبقول كلام - مش بانتظام ..

افهم دا إنك معترض ... ..

وبافتراض .. ..

إن كلامى ما يعجبك ... ..

طب بس قول - افرد حوار ..



رتب كلام ...  
يبقى وسيلة معرفة ..  
وتكون بقى دى مشرفه ...  
يحصل كده بينا كلام ..  
يبقى تمام - تهدى النفوس ...  
ولا ابقى احوس ..  
وافرض كلام ...  
خطير ماكانش فى نيتك ..  
واللى باين لى محبتك ...  
بس اللسان - ملوش امان ..

.....

## بفتلة وابرة وخيط

بفتلة وابره وخيط فى مكر  
دا كل حياتنا بتبقى تمام  
بندفى ونكسى فى برد وحر  
ونقضى حياتنا فى خير وسلام

.....

بفتلة بنعمل صوف وقماش  
وبدله جديدة جاكته أسبور  
وقيمة عظيمة فى وسط الناس  
وتبقى مقاسنا داير ما يدور

.....

بفتلة بتلقى ستاره تحميك  
من اللي بيص عليك ما الناس

ولونها جميل وذوق يرضيك  
ويبقى لا فيه جرح الاحساس

.....

بفتلة بنسج توب لزفاف  
عروسة جميلة وتقرح بيته  
بياضه يكون ناصع ينشأف  
ويومها حياتها بتبدأ بيته

.....

بفتلة وابره بنقف ل جروح  
ولحم نلمه ويلحم تمام  
وتتقذ حياتنا تصحى جروح  
ويشفى المريض ويخرج قوام

.....

وحلاق بفتلة ينضف حدود  
يلمع وجوهنا وتبقى جميلة

وشعر يشده ومن غير حدود  
ينعم وشوشنا وتبقى أصياله

.....

بفتلة وابره نخيطة جزمنا  
ونعل نشد في قالب خشب  
وجزمة جميلة بتعجب حرمنا  
وتبقى دي هيئة عز الطلب

.....

وفتلة ومنجد يخيطة مراتب  
بيحشي مخدات ويعمل لحاف  
وبرضه بنعمل قلع المراكب  
وتمشي بقلوعها الآخر المطاف

.....

وفتلة وابرتين بنغزل ف صوف  
ونعمل بلوفر ومن صوف خروف

والوان جميلة ونعمل جاكاز  
وغرز طويلة وجرب وشوف

.....

بفتلة تخينة تطير طيارات  
وفوق السطوح بنزخى الخيوط  
وتطلع لفوق فى السما والسحاب  
وتفرح ولادنا تشد الخيوط

.....

وفتلة وتر تبقى فوق الكمان  
ونعزف عليها نقول الحان  
وسهرة جميلة ورقص وغناء  
نغنى ونفرح نهيص كمان

.....

وسجادة مفروشة اصلا فتل  
غزلناها ع النول وجمع فتل

رسمنا عليها رسوم وورود  
ودسنا عليها بخف الجمل

.....

### حبیبتی

یا من احببتك حبا

ملك على فؤادی

یا من كنت عندی سبیا

ارقی فی اللیل سهادی

.....

یا من اتمنی رؤیتها

فی خیال حتی فی احلام

والقلب یروم لطلعتها

وانا اغمض عینی لأنام

..... ٩٠ .....

لو اسمع صوتا يشبهها  
اتلفت حولى حيرانا  
نبرات تدخل اذنى  
نغمات حلوة احيانا  
.....

والشوق يطوق نظراتى  
والهبة تطرب للقاءها  
والحب يهدد ارجائى  
لكنى قطعاً اهواها  
.....

لا اذكر انى قد احببت  
حبا ملك على حياتى  
لا ادرى ان كنت اصبت  
وانا اسمع صوت أناتى  
..... ٩١ .....

ويزيد الهجر عذاب الروح  
ولهيب الوجد يهد الروح  
وجراح القلب تعذبني  
واريح الحب في نفسي يفوح

.....

والناس حيارى في امرى  
لا احد يصدق احوالى  
والاحير ان لا ادري  
لا اعرف حتى ما جرائى

.....

ابهذا الحب انوه انا  
او كان غراما يعصف بي  
ام هذى تجربة اولى  
ويكون الحب رحما بي

.....



يا من اعطيتك قبالى  
ووهبتك حبا يملكنى  
ايكون جزائى فى هجرانك  
وضياع الحب يؤرقنى

.....

لكنى قطعاً اتعلم  
وسأترك قلمى يتكلم  
يشرح ما عن افكارى  
وانا صامت لا اتكلم

.....

فالحب تراءى لى كسر اب  
لكنى افقت وكان ضباب  
لم اجد حبيباً ينصفنى  
ووجدت امامى كل عذاب

..... ٩٣ .....

## والثالثة خدها زويل

فى مصر طالع لنا عالم وباعه طويل  
الاسم احمد واسم الجد هو زويل  
كتر الزمن صغره وفتت الثانية  
قسمها بلايين بليزر واصله مصرى اصيل

.....

عطوله جايزة كبيرة ياخذها اعظم العظماء  
اخذها اديسون وكورى واشهر العلماء  
واللى اخترع تليفون وخدم العلوم والناس  
لكن بقى المصرى كان من اشهر الخبراء

.....

دى مصر ولاده واولادها كتار وعزاز  
رفعين رايتها وفى العالم كده افزاز  
علما ودكاترة وحتى فى الفضاء طاهرين

اخذوا الجوايز كثير وابحاثهم كده تتعاذ

.....

نوبل دى جايزة عظيمة مش بس اى كلام  
واللى ياخذها دا لازم ابحاثه اعلى مقام  
يتعب ويشقى وعمله يفيد كده الانسان  
وبعد لما ياخذها يضربوا له سلام

.....

وزويل دا ابن الفراعنة رشحوه ليها  
واتجمعوا الاراء وقالوا اللجنة تديها  
عن العلوم ويا كيمياا لحبيبنا هو زويل  
لانه اعظمها عالم فى العلوم فيهم

.....

وف نص اكتوبر دا عيد الانتصار طالها  
ودوى اسمه فى العالم بقى ونالها

ومصر فرحانة فى اعياد العبور طبعاً  
والفرحة صارت فرحتين بالعبور وزويل

.....

نوبل اخدهما السادات لانه عمله سلام  
واديينا محفوظ اخدهما عن الادب وتمام  
وف العلوم تبقى تالتة ودى اخدها زويل  
دى مصر ولادة اولادها حققوا الاحلام

.....

### التاكسى

يا معطلين السكك ايه راح ينوبكم ايه  
لما فى وسط الشوارع تاخذ الطلب كده ليه  
اركن يمينك وحضن حمل فى ركابك  
ولا تعطل شوارع وتتقفل كده ليه

.....

كنا زمان نركب التاكسى ويمشى على كيفنا  
قبل ما يمشى يقوم يسألنا وجهتنا  
دلوقتى قبل ما نركب لازم نسال طريقه ايه  
مطرح ما خيرواح نروح مابقاش على كيفنا

.....

ياخد طلب على طلب والتاكسى ييقى زحام  
عمرك ما توصل لبيتك حتى فى الاحلام  
لكن بتنزل على شارع طويل واخره بيتك  
ولا هيه تبقى كده ولا تقدر تبوح بكلام

.....

لكن بقى معذور صاحب التاكسى وانا عارف  
بنذيرة تبقى قروش وهو كثير صارف  
بنزين كاوتش وقطع غيار غير بقى مخالفات  
سواق بينهب كثير وصاحب التاكسى اهو عارف

..... ٩٧ .....

لازم نعلی بنديره تكون بداية معقولة  
ونخف فى مخالقاتنا لما تبقى هيه معقوله  
أصل الزحام يبقى زنقة ييوظ الماكينات  
والتاكسى يعطل ويسخن ولا تبقى مقبولة

.....

فى التاكسى لما نشاور ويقف فى نص دى الشارع  
ولا مره يركن يمين ويعطل نهر دى الشارع  
تركب واهلك معاك حسب هوه ما يرضى لك  
ويعطلوا كل المرور والزحمة فى دى الشارع

.....

.....  
.....  
.....  
.....

## السلام

دلوني والنبي يا خوانا مين اللي اخترع السلم  
مين اللي قسم درجاته ومنين يكون دا اتعلم  
دخل السلم كل حياتنا وبقي ضروري قوى ومهم  
وانا حاتكلم ارغى اقول كل اللي عرفته عن السلم  
.....

سلم بيتنا اللي لولاه عمرى ما روح بيتنا انام  
اطلع درجة وكمان درجة أوصل دورنا بسرعة قوام  
لوفى لعاشراوكان أكثر برضه رح أوصل بالمضبوط  
وانامش عارف مين اخترعه منى اليه الف سلام  
.....

لو فى وظيفة لازم سلم درجة بدرجة وبترتيب  
يوم ما تعين يركن درجة مدة طويلة برضه يغيب  
لوفيه واسطة يجرى قوام يطلع دغرى بأسانسير

أما اذا كان غلبان تتأخر في الدرجة وضروري تغيب

.....

فيه في السينما برضه المسرح تلقى السلم تطلع بيه  
بيسموه المجد ياعيني ياما يقاسوا وهما عليه

لو كان واحده يبقى المخرج بيساعدها تجرى عليه  
لو كان واحد عمره ما يوصل غير بكفاح وأهو تفهم ليه

.....

دا لما يجيى الشتاء والمطر بيرخ وبينز  
يغسل هموم البشر اصل انا بيتي على منزل

الميه تجرى ولا تعمل بحرور واحتاس  
اما بقيت الشوارع بتغرق لما المطر ينزل

..... ١٠٠ .....



حتى موسيقى لازم سلم لما يغنى يقول ياليل  
دورى مى فاصول لاسى هو يغنى يقول مواويل  
يطلع بره يبقى نشاز والصوت فيه يبقى قبيح  
لوفى حدود والسلم غنى يرجع صوته ويبقى جميل

.....

لو فى حريقة لازم سلم تجرى وتنزل دغرى عليه  
وان ما لحقتش تيجى مطافى تفرد سلم تنزل بيه  
يوصل لادوار العليا ينقذ كل العيلة كمان  
ودا يبقى سلم من برة تبقى ساعتها محتاج ليه

.....

حتى الحب دا لازم سلم درجة بدرجة وهو يزيد  
لو حتحب فى اول نظرة حبك عمره ما يبقى اكيد  
لازم تبقى نارك هادية سوى الحب على الجنبيين  
تفضل باقى عمرك كله راضى متهنى وسعيد

..... ١٠١ .....

لو فى تجارة برضك سلم اسمه ضميرك تعمل بيه  
لو حتغش حتوصل بدرى بس بسمعة ضعيفة يا بيه  
تفضل ماشى خطوة بخطوة عين الكل عليك بتبص  
لما حتوصل برضه يقولوا كل كلام وحتسمع بيه

.....

شفت بقى للسلم فايده وبنعرفها احنا كمان  
لو نطلعها درجة بدرجة كل حياتنا تبقى امان  
لو نطينا او عشيننا برضه حنطلع لكن قهر  
نظلم نقهر كل الناس ودا يغضب رب الاكوان

.....

النحو فى البرد يبقى لذيذ لكن بارد  
بيخلى كل البشر فى بيوتها ويلم الشارد  
اصل البيوت تبقى دافئة وجوها هادى  
ولما يلقي الحنان جوه بيته الحب دا وارد

.....١٠٢.....

## سكت الكلام

من زمان قلبى يناديكى ..  
بده يطمئن عليكى ...  
بالهنا يتمنى ليكى ...  
اصل يعنى الكلمة حلوة ...  
احلى معنى ..  
تتسمع فى الودن غنوة ...  
لو تساعنا ..  
تتفرد وتقول كلام ...  
رافتك تبقى تبان ..  
اهل ياختى من زمان ...  
ما سمعت صوتك ..  
وسبت حديثك ...  
وانت ساكنه علشان مزاتى ..

٣

ما أحنّا كان قبل الجواز ...  
ماشى الكلام ...  
والى يمشى من بعيد ...  
بيلاقى صوتنا ...  
همسة حلوه مستمرة ...  
والى يقعد جنبنا ..  
بيلاقى ودنه تتملّى ...  
بحديث طلى ..  
حب وغرام ...  
وبتجلى ..  
ايام خطوبة كات لذيدة ...  
ذكرى عزيزة ..  
لما كنا فى الكلام ...  
عالى وتمام ..  
موضوعتنا كانت كتيرة ...

لو كبيره او صغيره ..  
تتخلق تملئ حياتنا ...  
كام دقيقة ..  
والحقيقة ...  
كات في كل الموضوعات ..  
من قريب أو من بعيد ...  
الكلام برضه يفيد ..  
ليه نسينا كل ده ...  
لما الجواز ..  
ابتدا برضه كده ...  
من غير كلام ..  
الا لما يكون ضرورى ...  
فى الفلوس او فى الحياة ..  
اعمل أية يا ناس قولولى ...  
١٠٥

مخى راح منه الكلام ..  
والحياة كات لونها بمبى ...  
اصبحت ولونها راح ..  
والصباح ...  
يجينى وليلنا كله راح ..  
كنا زى اثنين كنارى ...  
زقزقة وتغريد كمان ..  
والزمان ...  
فات بسرعة واحنا كنا ..  
الهنا كان بيلازمنا ...  
لما كنا مخطوبين ..  
قبل ما يصبنا الجواز ...  
بالخرس منع الكلام ..  
والحياة برضة استمرت ...  
١٠٦

صمت عام ..

أو ننام ...

برضه أحسن منا لكلام ..

.....

## العدد خمسة

لاحظت في حياتنا رقم موجود عدد خمسة  
واصابع اليد عديتها لقيت خمسة  
وربنا فرض الصلاة خمسين وخففها لخمس  
خلفائنا في المسلمين وصل العدد خمسة  
في النحو أسماء شهيرة عدها خمسة  
وناس تحاف م الحسد تتكلم تقول خمس  
كام ركن في الاسلام اسألني كلهم خمسة

وحواس الانسان مخلوقة من خمسة  
واثنين يشاركو فى سيجارة يقول هات خمسة  
والطفل كان فى ابتدائى اتعلم سنتين خمسة  
والخطة خمسية تتنفذ فى سنين خمسة  
ورغيف بقرشين فقط رفعوه الى خمسة  
ومسرحية ربحانى سموها ناقص خمسة  
ونجمة البحر صوابها تكون خمسة  
ولمبة الجاز وبتنور كانت بالقليل خمسة  
وايات تتجى البشر هيه عدد خمسة  
وفيلم لـ فريد وكان اسمه رصيف خمسة  
وشادية غنت لـ ستة ضربتها فى خمسة  
وماهية الشهر تخلص يدوبك فى يوم خمسة  
وكلونيا مصرى اصيلة وعليها خمسة x خمسة



وفى آخر الامتحانات دا باقى م الزمن خمسة  
وعين حسود وتبقى دايرة تشبه رقم خمسة

## **خواطر فى الطائرة من هيوستن الي فرانكفورت**

عدى الشهر بسرعة وفات ..  
وانا ما لحقتش ...  
لسه بخلص فى السلامة ..  
لسه ما شفنتش ...  
ما اتمتعنتش ..  
لسه فى بالى حاجات وحاجات ...  
عايز أعرفها ..

لكن ما سعنش الوقت ..

عدى قوام ...

زى ماكون بحلم دلوقت ..

والى رأيتة دا كان فى منام ...

الدنيا هنا حاجة جديدة ..

عيشة سعيدة ...

بس أن كان الوقت سعننى ..

والايام مامشت وسابتنى ...

كنت أسوى كل هوايل ..

واكتب شعرى وافضل قايل ...

شفت نظام ترتيب وجميل ..

كله بيعرف ايه الواجب ...

يمشى دغرى ولا بيميل ..

اتربى على كده بزمان ...  
لا تلاقى ورقة فى الشارع ..  
ولاحد بيرمى كلينكس ...  
من عربية ويجرى يسارع ..  
والطوابير دا نظام معمول ...  
ولا زحمة عند الشباك ..  
واحد بس يكون موجود ...  
والباقي على بعد هناك ..  
ولا تسمع للناس أصوات ...  
ولا غنوة فى الميكروفونات ..  
ولا حد يزقق لأخوه ...  
ولا لمه والناس ضربوه ..  
ولا اتوبيس مزحزم بيعدى ...  
مايل على جنبه ويهدى ..

ولا ميه تملا فى شوارع ...  
بعد ما تشتى الدنيا كتير ..  
دى مجارى واسعة مقضية ...  
مش مواسير وبقطر صغير ..  
وشوارع واسعة وعريضة ...  
كل طريق بتلات مسارات ..  
عمر ما يركن حد فى شارع ...  
فيه ساحات للعرييات ..  
قدامه كل محل تلاقى ...  
حته كبير كتير مساحات ..  
يركنوا فيها قد ما يركن ...  
ما فى صعوبة فى الركنات ..  
اما العمارات بينوا بكثرة ...  
فيها أدوار أكثر من ميه ..  
ولا مرة وقعت له عمارة ...

ولا فيها حديدة مصدية ..  
بينوها من غير شبايك ...  
من بره ينصفوا بسقالة ..  
لاعمارة مشرحة وعديك ...  
ولا مونة طلعت بطالة ..  
كل تاريخهم ابيض ناصع ...  
عمر ما مرة عمارة انهارت ..  
واللى بيغلط لم بيتسامح ...  
لازم شغله يكون كده ناجح ..  
هنا فى الشغل جد فى جد ...  
ولا حدش بيكلم حد ..  
بتحاسب عالوقت بدقة ...  
قد ما تعمل قد ما تاخذ ...  
ولا حتكاير ولا حتعانء ...  
وبلدهم ما شيه يتقدم ..

يوم عن يوم تطلع فى العالى ...  
اطفالهم دايمًا تتعلم ..  
كل جديد فى اليوم طوالى ...  
لما الشباب يعوز كلية ..  
لازم مصاريفها من جيبه ...  
يعمل بعد الظهر فى شغله ..  
والصبح يروح الكلية ...  
ولا عيلة بتروح وياه ..  
لا دروس بياخذها خصوصية ...  
وف شغله مطحون تلقاه ..  
علشان مصاريف الكلية ...  
يطلع راجل مسئول دايمًا ..  
ولا يتكل على جيب غيره ...  
وطريقه مرسوم كده دايمًا ..  
حافظ خطة وراسم سيره ...

والابحاث دائما موجودة ..

تلقاها في كل المجالات ...

ومشاكل تتحل بجوده ..

وبيكتبوا كل احتمالات ...

.....

## **سفر زوجتي لامريكا**

افكار الليل دي محصراني ..

مش عارف انام ...

ولا غمض عيني اه ياني ..

ولا تيجي أحلام ...

ومراتي فانتتني ..

ومش قادر ...

اتصور نفسي من غيرها ...

والعمر اهو طال ...

فين هي اللي الحب مليها ...

فين هيه دايمانا اناديها ...

واقول دا كلام ..

وارض واعدد معانيها ...

دا غرام وخصام ..

وبنادي بحلمي على طيفها ...

امتي رح تيجي واشوفها ..

دي اعز من روي عليه ...

لها قلب ومليان حنية ..

بس شوية ...

ودا لسه وفاضل كام شهر ..

ودا يبقى القهر ...



فی فراغ أنا عایش من غیرها ..  
وانا اعمل ایه ...  
ودا کله دا لیه ..  
سافرت والبعد محیرنی ...  
دا آلف و آلف ..  
والحب اللى مالینى قهرنی ...  
ومسهرنی ..  
اوقات اوقات ...  
وخیالها ملهلب افکارى ..  
حاقدر ادارى ...  
حبى وعذابى بغربتها ..  
وبحلاوتها ...  
عشره طويلة ..  
برضه جميلة ...

امتنى حتعود ..  
والود يسود ...  
ترجع لى ويتم هنايا ...  
كده ويايا ...  
صونها بيجلجل ...  
فى ودانى ...  
حتى لو كان ..  
صوت حيانى ...  
نغمة رقيقة ..  
وانا فى دقيقة ...  
حائسى عذابى ..  
فى البعد ...  
ويعود الود ..  
واتهنى بصحبته معايا ...

بأقى من عمرى ..  
وأنا من بدرى ...  
عارف أن الوحده عذابى ..  
وأهى على بابى ...  
واقفة تشاور ..  
أنا جاية ...  
بعد شوية ..  
نتهنى كده مع بعضينا ...  
نقضى اللى فاضل لينا ..  
فى صفا وهناء ...  
ياالله يا رجاء ..  
.....

## الحواس الخمسة

ربى خلقنى كائنسان وبنعمة كرمنى  
فضله على كـبير العقل شرفنى  
ميزنى على خلقه وسخرهم لخدماتى  
لازم بقى أشكره وده برض يقربنى

.....

## البصر

عندك بقى نعمه بصر واشوف بها خلقه  
من بحر او ارض ومناظر كثير خلقه  
واعرف طريقى واعمل واربى اولادى  
وابص واتأمل فى كل اللى ربنا خلقه

.....

## السمع

والسمع دا من اكبر نعمه خدناها  
نسمع نميز كافة الاصوات ونرعاها  
تنفع فى وقت الخطر تنقذنا من الاضرار  
أما الاذان نسمعه فى أوقات عرفناها

.....

## اللمس

باللمس نلمس نميز كل شىء فى الكون  
نعرف اذا كان سخن او بارد مهما يكن  
اذا كان خشن او ناعم او كان يضر الايدي  
او خد ناعم حريز من كل صنف ولون

.....

## الشم

بالأنف نقدر نميز بالشم فى روايح  
إذا كان نشوف أكلنا لما يكون صالح  
ونشم ريحه الشياط قبل ما يبدى حريق  
وكم ان نشم الطبخ ودى لذة وروايح

.....

## الذوق

اما اللسان دا يذوق ويعرف كل شىء حواليه  
إذا كان دا صالح أو جادق وحلو دا ليه  
وبعدها نبلع ونستطعم بطعم جميل  
ونعيش حياتنا ونتمتع بكل داليه

.....

شوف ربى انعم علينا ونعمه ديه كتير  
وحواس دقيقه وخطره وهو دا اللى يصير  
فوق دى كله عطانا العقل يتحكم  
يرشدنا للخير ونشكر ربى هوه كبير

.....

## رباعيات

اعلان فى تليفزيون بيعلن عن حاجات وحاجات  
دا عن بضائع كثيرة وجميلة متكلفة الوفات  
وابنى قاعد يشاهدها ويقوللى هات من ده  
شوكلاته بومبونى شبس وبرضه حلويات

.....

وانا اعمل ايه ومرتبى يادوب يكفى ليوم خمسه  
والعيشه غليت ونارها لسعة وانا حسه

واللبس عايز فلوس والحزمه دى بميات  
وعشاننا نكمله نوم وباريت بقى ينسى

.....

دا الصيف خلص وانتهى واهو الخريف اهو هل  
وانجو هادى وبارد والبحر هادى واهو هل  
ومصيفين مشبوا وسابوا الشط كده فاضى  
وبوادر البرد هلت والشتاء اهو طول

.....

القعدة فى البيت كنييه لوحتبقى معاش  
فى البيت يبصولك كعاطل بس لك دا معاش  
ونصيحتي سيب البيت وانزل امشى فى الشارع  
وان كنت شاعر دورلك على ندوه وماتتساش

.....

الحير يقولوا عليه انه بيحى بقدم الواردين



ودا كلام فيه تفاؤل بالناس والجايين  
وتبقى اكبر تحية جميلة للى بييجى لك  
وكرم فى اخلاق وترحيب وصى عليه الدين  
.....

وترامنا حلوه وبتداخد فى النقلة كثير ا جدا  
مقدارها خمس اتوبيسات ولا ييانوش ابدا  
وكراسى تبقى كثيرة ويقعدوا الستات  
واحنا واقفين كرجاله ولا نقعدوش ابدا  
.....

### رباعيات

ياسايل الستر استر علينا قبل عمرنا ما يفوت  
واحسن ختامنا ياربى واحفظنا حتى نموت  
والذكرى تبقى جميلة فى الدنيا بعدينا  
من خير تركناه او اولاد بتصرف قوت  
..... ١٢٥ .....

انا شفت فى الشارع كلب واقف يهوهو ليه  
نازل حراسه شديدة مش عارف بيحرس ايه  
لكن اهو بيحرس تمام لان دا شغله  
يفضل يهوهوا ولا واحد يرد عليه

.....  
انا كنت فاكر زمان ان الحياة سهله  
والحب فيها كثير بس الهنا وهله  
فيه المشاكل والعزول وكثير كلام الناس  
اما الفرح والوصال دا صعبه مش سهله

.....  
والناس تروح للغنى عايزة تبوس فى ايديه  
فاكرين تمام ان الحياة والرزق دا بايديه  
والى خلق الخلايق هوه اللى وفر رزقها  
دا مش بايد انسان لا ينقص ولا يزيده عليه

والبيت زمان كان يساع العيلة والاولاد  
واسع فسيح والسقوف عاليه كده وبعاد  
والعيله دي كبيره وملموه مهما العدد بيزيد  
دلوقت كل الاولاد ضيقة ولا تساع اولاد

والليل سكونه غريب لما تكون مرتاح  
والنوم يجيلك ولا تسهر مادام مرتاح  
اما القلق لما يصيبك دغري يروح النوم  
تفضل عيونك ما تقفل حتى يهل صباح

### رباعيات

انا كنت افخر واقول انى انا انسان  
لكن بعد الى شيفته نفسى اكون حيوان

حيوان بيقتل فريسته لاجل ياكلها  
لكن بقى الانسان يقتل اخوه دا جبان  
.....

الشمس تمشى فى مدارها فية غروب وشروق  
برضه القمر يطلع ينور فى السماء ويفوق  
والليل بيخلص وبعده برضه بيגיע نهار  
فيه الحياة تبقى كده تصفى كده وتروق  
.....

حزين ولكن فى جوايا امل طاغى  
ودايما احلم تملى حتى وانا صاحى  
احلامى دايما بسيطة ونفسى تحقق  
ايام كثيرة تمر عليه وقليله افراحي  
.....

الحب يملى فى قلبى مش عارف اعمل ايه  
١٢٨

لما رايت للصبايا جايه تهل عليه  
حسيت انوثه جميله جت حواليا  
دا الحب يبقى جميل لو حافظت عليه

.....

يا مفرقين الحبايب ايه راح ينوبكم ايه  
لما تدسوا الكلام وتزيدوا برضه عليه  
وتشعلوا النيران بين المحبين وترعوها  
لحد ما يزعلوا رح تستفيدوا ايه

.....

انا شفت قطه كانت والده مع عيالها  
وعينها تحمر تتفر لو قربت لعيالها  
هيه الامومه كده بتخاف وتحميها  
وساعات تلاقى فى البشر ام ترمى عيالها

.....

## رباعيات

قالوا العتب عالنظر انا قلت نظرى خف  
ورجلى تعبانـه ومش قادر اكمل لف  
ودا حكم سنى بقى بعد العمر ما طول  
اعمل حسابك بقى والبس ثقيل واتلف

.....

تلقى الصبايا وانت ماشى على كل صنف ولون  
مسكين ماراح الشباب ولا قادر تميز لون  
نفسك تعاكس بس كله عالفوضى  
احفظ كرمك بقى ولا تبقي يوم مجنون

.....

ربع الكلام مش بفهمه والباقي بيعدى كده  
اصل المخرج عنده بايظه والى فاضل هو ده  
يفضل يعيد فى الكلام والى يوصلنى قليل

وهو مش عايز سكوت وكلامه بفضل كل ده

.....

وان كنت حاجه حلوه يقولوا سكر ك حيزيد  
وان كانت الحاجة حادقة الضغط برضه يزيد  
واحترت والله ياناس قولولى اكل ايه  
لازم الدكاترة يشوفولى اكل بيقى جديد

.....

والضلمة حلوه قوى وبتخوف الجبانات  
والفكر فيها مرتاح لكن بتكثر الخيالات  
فيه ناس بقى بتعز الضلمه وتعوزها  
وناس كده بتخاف من الضلمة والخيالات

.....

ليه الامل لما اجرى وراه يروح لبعيد  
واعمل وازود فى جهدى وهو جريه يزيد

ولما أجرى الحقه القياة فى ايدى سراب  
واتمنى يوم احققه وابقى فى حياتى سعيد  
.....

## رباعيات

عجيبه ان الناس بتطلع كل يوم رحلات  
ويجوبوا اطراف البلاد ويكشفوا الريفات  
ولاحد فكر يقوم برحله جوه النوس  
ودى رحلة عظيمة تعرف فيها الازيات  
.....

القلب دا مضخة بتفضل طوال العمر شغاله  
والعمر ده ممكن يطول سنين وهية شغاله  
واحنا بنشقى ونتعب ودايما بنجهدھا  
ولا عمرنا نصونها الا فى أصعب النالة  
.....



لو الوظيفة كبيره بتلقى الناس كثير حه الـ  
بیشوفوا طلباتك ويتمز به اشوداد دا لیک  
ویبقی وحتک منور قوی حتی لو کان ظلمه  
ولما سلطه تروح ما تلاقى حد بقى حوالیک  
.....

والمرأة دی انسان لکن طبعها دا غریب  
ولما تقضى طلباتها تبقی اعز حبيب  
لکن بقى لو تقصر تبقی حالتک حال  
دغری تبوز فی وشک تبقی عنها غریب  
.....

الحب اللى بعده جواز دلوقت مش ماشى  
لان اصل الجواز عايز تکالیف برضه مش ناسى  
شقه ومهر وشیکه وعفش کثیر بیتکلف  
والشباب اصله فقیر ما لماده اصله بیقاسى  
۱۳۳

.....  
اجتنى الزمان يرضى عنى والدنيا تصفالى  
وانول مرادى من الدنيا يرتاح بقى بالى  
يتلم شملى على المحبوب وقلوبى يتهنى  
وافرح واقول ان حظى بقى اهو جالى

.....  
**رباعيات**

البنيت قالت لابوها عايزه اروح لأمى  
اشكى وأحكى لها يمكن يزول همى  
دى الام صدر حنون تحتاجه كل الناس  
تفرد جناحها عليهم وهيه بتسمى

.....  
البنيت تلبس على الموضة تقصر كل فساتينها  
لحد ما بانوا رجليها وكشفت كل مفاتنها

ولما شباب يعاكسوها والفاظهم بتجرحها  
بتشكى تقول شباب تافه وهو العيب يكون منها

.....  
العلم نور وبينور فى ظلام الجهل  
والطفل لو كان صغير يبقى تعليمه سهل  
اما ان كبر من غير علام اهي هيه دى الكارثة  
للامه تتأخر ويكثر فى البلاد الجهل

.....  
ليه الهنات لما تكبر شكلها بيحلو  
ويجيلها خراط ويخرطها مهما كان الجو  
اما الولاد تلقى دايما شكلهم عاوى  
ويكبروا عالوحاشة ولاحد عمره احلو

.....

الدنيا زى الخيارة خضره من بره  
وقلبها ابيض اما القشرة دى مرة  
وان كلتها بقشرها من غير ما تغسلها  
تقع فى بير الغلط واهو تعيا بالمرة

.....  
ربى كريم ورزقنى باعز احفادى  
مىروان وادهم هما اعز اولادى  
يشيد ظهري بهم دول عزوتى وناسى  
يارب خليهم افرح بهم اغلى احفادى

.....  
كده تبقى غلطانة لأن فى مالبنيات الوفيات  
وفيهم الوجشين لكن فيهم كتير جمالات  
وربى خالقهم كده عشيان بالحب يهنونا  
لكن بقى فى الحقيقة يورنا الويلات

..... ١٣٦ .....  
.....

الحزن لما يتولد ضرورى يبقى كبير  
والدنيا بتضيق علينا تبقى حزم صغير  
لكن من نعم ربى انه عمره ما يكبر  
يصغر شويه شوية لحد ما بيطير

.....  
ليه انتى فاهمة ان ما فيش فالجمال زيك  
ولا حتى وش القمر ضيه مثيل ضيك  
وان رمش عينك ضرب لازم يصيب الوفات  
والنظرة منك بتأس القريب منك

.....  
الدولة تاخد ضرائب من الناس وتصرفها  
على الشوارع والمجارى وادى احنا بنشوفها  
مستشفيات ومدارس وفلايده لكل الناس  
واجب علينا نساعد الدولة فى مصارفها

.....١٣٧.....

الحزن لما بتولد ضرورى ببقى كبير  
والدنيا بتضيق علينا تبقى حزم صغير  
لكن من نعم ربى انه عمره ما يكبر  
يصغر شويه شوية لحد ما بيطير  
.....

## رباعيات

الست لازم تمشى تحت طوع جوزها  
وضرورى تبقى بشوشه ولا تلوى يوم بوزها  
تخلى عيشته سعيدة ويفوق قوى لشغله  
ويلاقى دائما فى بيته راحه بيعوزها  
.....

الطبع والروح بيقوا دائما فى جسد واحد  
ومهما حاولو يغيروه حتى ليوم واحد  
١٣٨

ومستحيل يحصل لانه بيبقى دا غالب  
لان ديل الكلب ما ينعدل مهما أتشد فى قالب

.....

أصل الكرم ببقى طبيعة لو دا ابن أصول  
ولما يبخل بماله تعرف أنه ماله أصول  
متربى على الفقر ويموت عالق قرش المليم  
ولا عمره يعرف كرم ولا قرش منه تطول

.....

لما الادان يدن بتحصل فى القلوب رهبة  
يتجمعوا فى الصلاة دايمًا يكونوا صحبه  
والى المساجد يسـيروا ويقيموا صلواتهم  
ويحمدوا ربهم على الايمان مع الرحمة

.....

والناس تقول وتحكى ويبقى كلامها كثير

عالفاضيه واللى اتملت والوضع ببقى خطير  
ويحكوا حكايات لا لها اصل ولا سيره  
ويتمنوا برضه يقولوا كلام ويبقى مثير

.....

ان شفت جارك فى خير لازم حتفرج ليه  
واوعى فى يوم تحسده او يوم تقرر عليه  
عمر الحسد ما يكون الا فى فعل الخير  
انت تزود فى خيرك حتى تفوق فيه عليه

.....

## رباعيات

البقره ان وقعت يهجم عليها الكل بالسكاكين  
طول ما هى واقفة تبقى جامدة حتى لحين  
وهو برضه كده فى البشر لما يقع راحر  
تلقى سهام الغدر جاياله شمال ويمين

.....١٤٠.....



انا لما يا قبض معاشنى بافضل كده ايام  
لحد يوم خمسة ويفرغ وفاضل كتير ايام  
والشهر لسه بحاله لازمه كتير مصروف  
اتمنى يبقى فى بلدنا الشهر خمس ايام

.....

وقبل ما نعايد نبص تشوف فى نفسينا  
ولو فحصنا كده نلاقى كل العيوب فينا  
دا اصل بيتنا قزاز وليه بقى بالطوب  
نحذف فى غيرنا ونلقى الطوب رجع لينا

.....

رحت اشترى خيار يكون أخضر وحلو وطرى  
قالو لى كيلو الخيار ده سعره على ومفتري  
وان كنت عايز خيار ينفع لكل اوان  
روح دغري هاتك كيلو خيار عسكري

..... ١٤١ .....  
.....

وظول حياته ساكن فى قصر له اود واسعين  
يعمل فيه حفلات كبيرة يملأها مدعوين  
رقص وموسيقى وشرب خمره وبعض حاجلات  
ساعة مماته بيرقد فى قبر يدوب يجى مترين

.....

الناس بتتجمع على الكورة لما تذيع ماتشات  
ويقعدوا يبصوا عالالعاب وهات قفشات  
فلان بيلعب كويس ودا خسارة يكون  
لعب لكورة شراب حتى فى الاستراحات

.....

### رباعيات

عربية شائلة خضار وفى مطلع ف زنايرى  
وحصان جاررها وتعبان وشايل خضار ميري  
قعد يكافح يحاول يشدها والناس بتضرب فيه  
عدى الترام وهيه مليانة وقالها سيرى

..... ١٤٢ .....

والدنيا عاطيه ظهرها والوش متخبى  
ومغمضة عينها فى وشى ليه بس يا ربى  
لو وشها يوم ضحك لى ثانى يوم تلقاه  
مقلوبة على وش تانى لا بيلمع كده مصدى

.....

وليه افكر واقول بعد السنين تصفى  
وبعد ليل الشتاء البارد والجو دا يدفى  
والاقى نفسى سعيد والهناء يجينى  
وفلوس كتير مالىه جيوبى هية ترصينى

.....

وف صغرى كانت امالى كبيرة مرسومة  
مترتبة فى افكارى اماكنها معلومة  
خطوة ورا خطوة وراسمها كده فى بالى  
ووقت تنفيذها لقيت افكارى معدومة

..... ١٤٣ .....  
.....

## رباعيات

ابص الاقى الحياة فى الدنيا لها آخر  
ومهما طال الزمن فى نهايته له آخر  
والحظ مرة بيدى وساعات ما يدبشى  
والهم دائما يزورنى لكن برضته له آخر  
.....

والصحة دى نعمة وربك وهبها لنا  
ونبينا وصانا نأخذ بالناس منها ونصونها  
لكن بنسهمل وبنزيدها كل يوم اضرار  
من شرب دخان وخمرة وكله بيشينها  
.....

ولما تتوى الصلاة لازم تكون طاهر  
وبنية صافية وقلب س تيم كده وطاهر  
تخشع لرب العباد دى وقفة بيمين ايدى الله  
يغفر ذنوبك وتخرج بعد الصلاة كده طاهر  
..... ١٤٤ .....

الشباب دا مشكلة كل جيل فكرة عليه  
يطرحوا كل المشاكل كله يسأل حل يه  
هية شقة واللا مهر واللا قلة فى المرتب  
هية دية الاخرانية زودوا كله عليه

.....

ساعة خروج المدارس فى الظهر تلقى بنات  
شابات فى سن زواج مترصصين الوفات  
اقعد افكر فى نفسى واقول ايه اللي يجرالهم  
لوجه عريس ليهم وفين يسكنوا فى شقات

.....

والفن دخلوه كتير من اوسع الابواب  
ودا ابوه مخرج او ممثل تتفتح له ابواب  
من غير لا فن ولا موهبة بالواسطة بيعدى  
مع انه فى الفن للموهبة لم تفتح الابواب

..... ١٤٥ .....

## رباعيات

والكلمة دى هادية وحلوة وتفرض فى مشاكل  
تبقى المناقشة فى هدوء ولا حد يتشاكل  
وكلمة حلوة دى منك وزيتها تبقى مال حاضرين  
تلقى الغضب بيروح ولا تبقى فيه مشاكل

.....

والأهل عزوة ووصل الرحم دا واجب  
دايما تزورهم تمد الود وتصاحب  
فى الزنقة تلقاهم بيتلموا كثير حواليك  
والكل يبساعد فى حل المشكلة وبقي صاحب

.....

الناس بتجرى على الاخبار تلملمها  
وتتقى اجدع خبر واللى غريب منها

وترتبه وتوضبه وتزود عليه تحابيش  
وتتشره في الخلايق وتروجه بينها

.....

في كل شارع جديد على ناصيته قهوة  
راصة كراسي عالرصيف تفتح على سهوة  
والناس دي قاعدة مترصصين دايمًا  
بياخدوا قعدتهم وتحلى القعدة في القهوة

.....

جامع كبير وجميل ومبنى في حنة مقطوعة  
فيه الشموع والفخامة والمدنة مرفوعة  
موجود فابو يوسف دي حنة في العجمي  
لكن مسيرها تعمّر قوام وتبقى مفتوحة

.....

راح فين زمانا ودلوقت دا زمان غيرنا  
كل اللي فيه مش بتاعنا دا بتاع غيرنا

والسرعة صبحت دى طبعه اما الهدوء دازمان  
والخير دا منا اتسحب وراح كده لغيرنا

.....

### رباعيات

بطلت احلام ومش عارف جرى لى ايه  
انام يوماتى عميق وعمري ما حلم بيه  
ياهلترى عقلى دا الباطن بقى فاضى  
ولافهشى خيالات وامال كده بقى ليه

.....

انا جيت لى الدنيا ومش عارف مصيرى ايه  
وصرخت صرخة كبيرة وانا نازل ما ادرى ليه  
والدنيا كانت فسيحة وانا كنت خارج من الزنقة  
طيب قولولى بقى انا كنت باصرخ ليه

.....



بصيت لنفسي في المراية بعد سن كبير  
قدامى راجل عجوز يشبهني برضه كثير  
الوش كرمش والبياض سارح كده في راسي  
يا هلترى دا يبقى مين عجوز وشكله مثير

.....

واقعد في وسط الناس واحكى عالي يجراالى  
واللى لقينه في حياتي ولا كان على بالي  
لفيت ودرت كثير والاخر اهي قعدة  
في البيت مع الذكريات رايحة وجايلالى

.....

وحياتي بقيت ورايا وانا ابص والقاه  
فيها حوادث كثير مش قادر انساه  
المر فيها كان كثير والحلو دا صدقه  
وربى انما باحمده عالصحة ما احلاها

..... ١٤٩ .....

والضلمة بتريح النظر وتخلي الفكر دا يسرح  
والدنيا تجرى معانا من مطرح الى مطرح  
خيالات دي تبقى كتيرة تروح وتيجى تانى  
ولما يجيى النور عليها ما تلاقيش مطرح

.....

### رباعيات

الحب بقى فى الزمان كلمة وغنواية  
والكلمة طالعة من القلب برضه لها حكاية  
بس الحقيقة بتفضل عشان لها معنى  
يا امه تصدق يا امه تروح ف سهراية

.....

والذنب لما تعمله يفضل ضميرك حزين  
لو كان دا عندك امل حبيقى شديد ومتين  
يبنى القلق هو اللي دايمما تعيشه صباحى

لو مرة نام يروح منك تجيبه منين

.....

اثنين وكانوا اصحاب احسن من الاخوات  
حبوا وكان حبهم واحده دى احلى بنات  
قعدوا يعافروا دا مين حيسبها للتانى  
والآخر اتفرقوا ودا كله من الستات

.....

شارع طويل وانا مشيته هنا لوحدى  
قربت انهى حياتى وانا لسة هنا وحدى  
نفسى بقى القى اللى يكمل بقية نفسى  
يرحمنى مالوحدة ويرجع للهنأ وجدى

.....

وكلام كتير باسمعه ولا عمر اتأثر  
والكلمة اللى لها وزن معروفة وتأثر

نہا معنی ہایل یخشی القلب وبعشش  
ودی تبقى كلمة اصيلة بس مش اكر

.....  
بندی حبيبتي وعمرى عنها ما استغناش  
مهما حصل منها قاعد هنا وما اسبهاش

هية ميلادی ولازم فيها دى نهايتي  
وان غير ترابها ما انا وعمرى ما اسهاش

.....

### رباعيات

من خطوة واحدة تبتدى رحلة طويلة الف ميل  
وقت المثل صيني ان فى الدنيا ما فى مستحيل  
يعنى قوة الارادة هية تدفع للامام  
هية دى اسباب كفاحنا نبتدى بيها القليل

.....

قضيت حياتي بالطول وبرضه عشتها بالعرض  
ولا عمرى مرة ف حياتى تركت يوم الفرض  
والفرض دا يبقى هو الواجب ادبته وانا راضي  
وحياتى رتبتهها بين السما والارض

.....

وطريقى كان مستقيم ولا فهش يوم عوجان  
واضح تمام وف حياتى كان ليه فيها مكان  
والصدق ويا الصراحة كان مبدأى دايما  
دايما كده حسبتى انى اكون انسان

.....

والحب هوه سببى وانشره فى الناس  
بمعاملة حلوة وجميلة مليانة بالاحساس  
والكلمة حلوة بتفتح مغلق الابواب  
وتعيش كريم ويا حبك موزعة عالناس

..... ١٥٣ ..... ١٥٣ .....

واسأل جميع الحبايب ايه السر فى نجاحهم  
وايه اللى وصلهم كده وساعدهم فى كفاحهم  
رجعوا وقالوا بالصبر وبالأرادة والامل برضه  
تمشى فى طريقه عزيز وتشارك فى افراحهم

.....

ولما بصيت كده وحسبتها دغرى كده برضه  
لقيت كلامهم صحيح والحق فيه برضه  
والدنيا عايزة مبادئ حلوة وصريجة  
وطريق كبير من اوله فيه الكفاح برضه

.....

### رباعيات

بالعقل فى الدنيا ربى كرم الانسان  
رتب حياته وحماها واتفرده له مكان  
لكن ساعات يرفضه ويغيبه عنه

يسكر ويشرب كيوف ويضيع بقى الانسان

.....  
الكورة عشان مستديرة عمرك ما تضمنها  
يبقى فريقك كبير يتقلب فى لعبة يلعبها  
والدنيا هييه كده دوارة مالها حال  
ساعة تكون فوق وتطويك ماتعرف ايه جرى منها

.....  
والناس حيارى ومش عارفين بيعملوا ايه  
ماشيين فى وسط الشوارع ولا يعرفوا كده ليه  
وف وقت اعمال دول زوجين من الشغل  
يمشى الحمل ازاي جماهيرنا يعملوا ايه

.....  
وعمرى ما انسى حضورى فى ايام الصراع والحرب  
وكننت عالجبهة لما العدو كان فينا نازل ضرب

تلقى القنابل تزغرد وحوالينا وفيها تصيب  
والناس تموت كل يوم ولا مما بطلوا حرب

.....

يبقى القلم مأسكه في ايدي لم يطلوعني  
لما اعوز اكتب عن اب جاحد وقابلني  
شرد عياله ولا عايز يجيب لهم طلبات  
يصرف على مزاجه ويقول الهم طلياني

.....

انا بدى يوم لكون نافع وافيد الناس  
ما هو نفسي فعلا رحيمة والكرم دا اساس  
والمال دا زائل وعمره بصدقه ما ينقص  
والحسنة عند الله اضعاف وما بيتساش

.....



## رباعيات

الأهل دى عزوتى ولازم اراعيهم  
واوصل كمان رحمهم واسمع كل شكوايهم  
دول يبقوا سدى لو وقعت مرة فى ضيق  
وبسرعة يجوا قوام والحل فى ايديهم  
.....

فاتورة التليفون بتيجى برضه بالميات  
ولا عمره مرة شبك وعمل بقى مكالمات  
مش عارف اشكى لمين مالناس يغيثونى  
أو حتى اسمع حديث أو حتى يوم سلامات  
.....

الشاب يتخرج وبعد دراسة قول كام عام  
وفاكر بانه حيعمل كل شئ ويبقى تمام  
يفرش فى شقة لعروسه والجواز حيتهم  
١٥٧

لكن بقى يلقي أحلامه تروح فى كلام

.....

الناس بترتاح لما يجيى الليل وعازمة تنام  
ومخصوصا اللي خلى البال ده بس ينام  
والباقي يسهر عشان دا أصله ظلم الناس  
يستغفر الله وبأسف حتى يبقى ينام

.....

عربات وماشية فى الشوارع عدد بالملايين  
والزينة جامدة ومتلطة شمال ويمين  
واكة مسدودة وشوارع تتملئ وواقفة  
ادخل الشوارع ضيقة ما اتوسعت من سنين

.....

الاحمة طلعت وغليت عند الجزار  
وان رحت اطلب لى كلسو يفتكر دا هزار

دا مهره بالعشرين وزايد برضه قول جنيهاات  
قولولي بس اعمل ايه في صاحبنا دي الجزار

.....

## رباعيات

انسان دا جسمه غريب سبحان من خلقه  
فيه العروق والدماء مترتبة في خلقه  
اعصاب في شبكة كبيرة والمخ دا ياامر  
بالكهرباء توصل بسرعة وعمر ما تخالفه

.....

الشوارع رحمة جامدة فيها عرييات وناس  
لما تمشي فيها لحظة تتوجع وتقول يا ناس  
ليه بيمشوا في نص شارع والرصيف موجود هناك  
قالوا بص هناك رصيف اتملى ما يساع مداس

.....

في الترام طلعت لى شلة مبسوطين بيهرجوا  
هما طلبة فى المدارس يدوشونا يسقفوا  
وان طلبت انت الهدوء واللا قلت يا ناس كفاية  
تنقلب طبعاً خناقة والكلام ما بيسمعوا

.....

وابص للدنيا والقى فيها الخير كثير  
والرزق متوفر للعباد وكفاية للجمع الوفير  
طب ليه بنتسابق ونخطف ما فى ايد الغير  
ما هو كله بينفعنا ويكفى كبير وصغير

.....

والناس على دى ودى يوم على ويوم فى الارض  
ودا رزق مكتوب وربك هو مقدره للفرد  
ومهما تجرى وتسعى لا تزيد ولا تنقصه  
واللى انكتب عاجبين دا هو بيقى الفرض

..... ١٦٠ .....

## أحلام

أنا وأحلم على سريرى  
وأغمض عيني واستعرض

حاجات وحاجات وأتأمل  
وأمنى نفسي واستفسر

.....

أبص الأقى وأنا نأيم  
حاجات بتجيني وأحلمها  
أصدقها ما أكذبها  
لأنى جوه بأحلمها

.....

أخذ عندك مثل صارخ  
ركبت ترام وكان فيه ناس

والكن على كرسي وجالس  
والبعض ضاحك وباحساس

.....

نزلت في محطة نظيفة  
لا ورقة تايهة بين القضبان  
ولا كيس بلاستيك متكوم  
ونضافة حلوة وارض امان

.....

طلعت في الشارع امشى  
لقيته شارع له رصيفين  
رصفانه فاضية عليها مشيت  
ولا فيهمش عربة على الرصيفين

..... ١٦٢ .....

صناديق زبالة كانت فاضية  
تتشال فى يومها ثلاث مرات  
ريحتها حلوة ومش طالعة  
مدهونة من برة ببويات

.....

والناس لقيتها مرتاحة  
ماشية بتضحك مبسطة  
والورد مزروع عالجنبيين  
اشجار صغيرة ومحطوطة

.....

ورحت فرن اجمع عيش  
لقيته فاضى وما فى طابور  
وعيش منور وبياضه  
ناصر وما فى اى قصور

..... ١٦٣ .....

وابص في نتيجة لقيتها  
في آخر الشهر افرنكي  
وامد ايدى في جيوبى  
لقيت في باقى فلوس فكى

.....

اننا قلت لازم دى او هلام  
او حلم يمكن ملاحلام  
فتحت عيني من نومى  
اصل اللى شفته دا كان احلام

.....

.....  
.....  
.....  
.....



| ص   | العنوان       | ص  | العنوان          |
|-----|---------------|----|------------------|
| ٨٣  | اسلوب حوار    | ٩  | المقدم           |
|     | بفتلة وابرة   | ١٩ | امداد            |
| ٨٦  | وخيط          | ٢١ | حلاوة الحياة     |
| ٩٠  | خبينة         | ٢٥ | نهار جديد        |
|     | والثالثة خدها | ٢٧ | الالفية الثالثة  |
| ٩٤  | زويل          | ٣٠ | حسبة الابام      |
| ٩٦  | التاكس        | ٣٤ | الاستنساخ        |
| ٩٩  | السكلام       | ٣٧ | حياتي            |
| ١٠٣ | سكت الكلام    | ٤١ | اعظم حب          |
| ١٠٧ | العهد         | ٤٣ | عيد ميلاد الرئيس |

| العنوان       | ص  | العنوان       | ص   |
|---------------|----|---------------|-----|
| هرب الاستنزاف | ٤٦ | خواطر فى      |     |
| ملحمة العبور  | ٥٢ | الطائرة       | ١٠٩ |
| الميزان       | ٥٨ | الحواس الخمسة | ١٢٠ |
| هنت حلو       | ٦٣ | رباعيات من ص  | ١٢٣ |
| رباعيات من ص  | ٦٥ | الى ص         | ١٦٠ |
| الى ص         | ٧٣ | احلام         | ١٦١ |
| فاتنة لسان    | ٧٤ | الفهرس        | ١٦٥ |
| العمر ضاع     | ٧٦ | رقم الابداع   | ١٦٨ |
| اوراق         | ٧٩ |               |     |



حقوق الطبع محفوظة للمؤلف  
بكل وسائل النشر  
بدار الكتب والوثائق القومية  
رقم الأيداع / ٨٠٤٦ / ٢٠٠٠  
( حلاوة الحياة )

٢٠٠٠/٤/٥

١٦٨

قريباً جداً

جابر ياقوت الجفناوي

يقدم

أحلام وردية



١٦٧